

08 SEP 2003

Agong-Sambutan (Bergambar)/I

AGONG DIBERIKAN SAMBUTAN NEGARA DI UZBEKISTAN

Oleh: Caroline Jackson

TASHKENT (Uzbekistan), 8 Sept (Bernama) -- Yang di-Pertuan Agong, Tuanku Syed Sirajuddin Syed Putra Jamalullail hari ini diberikan sambutan negara di Durmen Country Residence di sini, lawatan negara hari kedua Seri Paduka Baginda ke Uzbekistan.

Seri Paduka Baginda yang diiringi Raja Permaisuri Agong, Tuanku Fauziah Tengku Abdul Rashid adalah dalam rangka lawatan lima hari ke Uzbekistan, yang meliputi tiga bandar raya - Tashkent, Bukhara dan Samarkand.

Seri Paduka Baginda yang diiringi Presiden Islam Karimov, berkenan memeriksa perbarisan kehormatan sebelum diperkenalkan kepada orang kenamaan Uzbekistan dan diplomat asing, termasuk Menteri Luar Sodiq Safoev dan Duta Uzbekistan ke Malaysia Aybek Khasanov.

Turut hadir ialah Menteri Pengiring, Menteri Penerangan Tan Sri Mohd Khalil Yaacob dan Duta Malaysia ke Uzbekistan Mohd Zain Abu Bakar.

Seri Paduka Baginda kemudian mengadakan perbincangan dengan presiden itu bagi menandakan lawatan pertama ketua negara Malaysia ke bekas republik Soviet Union sejak hubungan diplomatik ditubuhkan antara kedua-dua negara itu pada 1992.

Lawatan Seri Paduka Baginda berdua ke negara itu merupakan lawatan balas Karimov ke Malaysia pada 1992, diikuti dengan lawatan yang sama dilakukan Perdana Menteri Datuk Seri Dr Mahathir Mohamad ke Uzbekistan pada tahun berikutnya.

Seri Paduka Baginda berdua akan diraikan pada santapan negara oleh Karimov dan isterinya Tatyana Karimova di tempat yang sama malam ini.

Pada Selasa, Seri Paduka Baginda berdua akan berangkat melawat bandar raya purba di Bukhara dan Samarkand, yang terkenal dengan tugu peringatan dan makam bersejarahnya.

Negara Islam di Asia Tengah ini yang terletak di persimpangan Laluan Sutera purba antara Eropah dan Asia mempunyai 25 juta orang penduduk.

Uzbekistan yang merupakan negara pengeksport kapas kedua terbesar di dunia mencatatkan jumlah keseluruhan perdagangan dua hala sebanyak RM7.3 juta dengan Malaysia tahun lepas.

Eksport Malaysia ke Uzbekistan, bernilai RM6.6 juta tahun lepas yang kebanyakan ialah televisyen, perabot, majrin dan minyak masak sementara import Uzbekistan hanya berjumlah RM0.74 juta, kebanyakannya adalah kapas.

Pada Khamis, rombongan diraja itu akan meneruskan lawatan ke Bandaraya Astana di Kazakhstan untuk lawatan negara selama empat hari.

-- BERNAMA

CJ HK BK